

## **Kalata ya Paulo ku Baefenso Busansulushi.**

Kalata ya ku Baefenso yalalembelwa pamo ne kalata yaku Bakolose mu 60 A.D. Mutumwa Paulo elyalambanga mwineti ewalailemba 1:1 Bantu beshikuyanda kwishiba bingi, bakute kusuminishana kwambeti Paulo endiye walalemba libuku lya Baefenso nambi kulyeti muliya mitende yakendi mbuli isa ili mulibuku lya Bakolose. Pacebo ici lyalikuyandikowa kumwaiwa mumibungano ili mucimpansha. Kayi lambangeti walikuba mu jele pacindi mpwalikulemba kalata 3:1, 4:1 ne 6:20. Paulo walapa Tukiko, kalata iyi pabulendo bwakendi bwa kufwakashila mibungano mu Efenso 6:21-22.

Efenso walikuba munshi unene, mucimpansha ca Asiya mu Loma. Efenso walikuba ne mpuwo cebo cang'anda ya kambwanga ka citukashi kaci Giliki kalikukwiweti Atemi Incito 19:23-31. Mubungano wa mu Efenso walikuba wayuma pakutatika nomba kumapwililisho walatontola 2:1-7.

Paulo lambanga mucintimbwi cakalata iyi munshila Lesa njalasalilamo bantu bakendi kayi mbuli mwalabapulushila kufuma mu bwipishi bwabo kupitila muli Yesu Klistu. Lelenkanyanga mubungano ne mubili uwo mutwi wakendi ni Klistu, kayi eti ng'anda ikute Klistu eti libwe lyankokola. Mucintimbwi cakupwililisha ca

libuku, Paulo lapanga malailile a bwikalo bwa ciklistu.

### **Mitwi ya makani**

Mucimpansha ca 1:1-2 Paulo lalyambanga mwine kayi lapanga mitende ba Efenso.

Kayi lambanga sha lwikatano pakati pa mubungano ne Klistu 1:3 mpaka 3:21

Kayi lalebanga ncobela kwikala baklistu 4:1 mpaka 6:20

Pakupwililisha Paulo lambangaponga maswi akupwililisha 6:21-24

<sup>1</sup> Njame Paulo, mutumwa wa Klistu mwakuyanda kwa Lesa. Ndalembelega bantu ba Lesa bali ku Efenso bashomeka mubuyumi bwabo bwekatana ne Klistu.

<sup>2</sup> Kwinamoyo ne lumuno bibe nenjamwe kufuma kuli Lesa, Bata ne Mwami wetu Yesu Klistu.

### *Kushoma Klistu kukute kuleta colwe*

<sup>3</sup> Katulumbaishani Lesa baishi Mwami wetu Yesu Klistu. Pakwinga mukwikatana pamo ne Klistu, Lesa walatupa colwe ciliconse ca mushimu kufuma Kwilu kupitila mu Mushimu Uswepa. <sup>4</sup> Lesa katanalenga cishi walatusalila limo cebo cakwikatana pamo ne Klistu kwambeti tukabe bantu bakendi baswepa babula kampenda.

Cebo ca lusuno lwakendi. <sup>5</sup> Lesa walabambilalimo kwambeti tukabe banabendi kupitila muli Yesu Klistu, pakwinga ecalamukondwelesha kayi encalikuyanda mwine. <sup>6</sup> Katulumbaishani Lesa cebo ca bulemeneno ne kwina moyo kwakendi nkwalatupa kupitila mu Mwanendi ngwasuni.

<sup>7</sup> Kupitila mu lufu lwakendi, Yesu walatusungula kayi tukute kulekelelwa bwipishi. Cakubinga kwiamoyo kwa Lesa nikunene, <sup>8</sup> nkwalatupa kupitila mu mano ne lwinshibo lwakendi. <sup>9</sup> Lesa walensa ciliconse ncalikuyanda ne kuyubulula kuli njafwe bubambo bwakendi bwalikuba kwasolekwa mucindi cakunyuma mbwalikuba wasalilalimo kwambeti bukwanilishiwe muli Klistu. <sup>10</sup> Lino cakashika cindi celela ca bubambo ubu, Lesa nakabike pamo bintu byonse mubwendeleshi bwa Klistu, bintu bya kwilu ne bintu bya pacishi capanshi.

<sup>11</sup> Bintu byonse nibikenshike kwelana ne mwine Lesa ncalayeyenga, kayi Lesa ewalatusala kuba bantu bakendi pakwikatana pamo ne Klistu kwelana ne kuyanda kwakendi kufuma pacitatio. <sup>12</sup> Neco, afwe twalatunguna kuba ne kupembelela kulico muli Klistu, katulumbaishani bulemeneno bwa Lesa.

<sup>13</sup> Kayi nenjamwe mwalaba bantu ba Lesa kufuma pa cindi ncomwalanyumfwa mulumbe wancinencine, Mulumbe Waina walamuletela lupulusho. Mwalashoma muli Klistu, nendi Lesa wasasuminisha pakubikapo cando cakendi palinjamwe ca Mushimu Uswepa ngwalamulaya, <sup>14</sup> Pakwinga Mushimu Uswepa engwalabenga Lesa, ecitondesho ca kwambeti nitukatambule colwe ico ncalalaya kupa bantu bakendi, lino tukute kwamba mu lushomo kwambeti Lesa nakalubule bantu bakendi. Neco katulumbaishe bulemeneno bwakendi.

*Mupailo wa Paulo*

<sup>15</sup> Pacebo ici, kufuma pacindi ncendalanyumfwa sha lushomo lwenu muli Yesu Mwami wetu kayi ne lusuno ndomukute ku bantu ba Lesa. <sup>16</sup> Cindi conse ndalumbanyanga Lesa pacebo canjamwe mu mipailo yakame, nkankute kuluba kwambapo sha njamwe sobwe. <sup>17</sup> Ndapailinga ne kusengeti Lesa wa Mwami wetu Yesu Klistu, Ishetu wabulemeneno amupe mushimu kwambeti mube ne mano ne kunyumfwishisha cena bintu mbyalayubululunga Lesa kwambeti mumwishibe cena. <sup>18</sup> Ndapailingeti myoyo yenu icaluke ibone cena mumuni, kwambeti muken-shibe cena kwambeti kupembelela nkwalamukwili Lesa nicani, ne kwinishiba kwina kwabulemu ne colwe ico Lesa ncalashomesha bantu bakendi. <sup>19</sup> Kayi nicakubingeti mwinshibe ngofu shakendi shabula cakwelanikako isho shilasebensenga muli njafwe otwashoma. Ishi ningofu shabula cakwelanikako. <sup>20</sup> Isha Lesa nshalasebensesha pakumupundusha Klistu kubafu nekumwikalika ku cikasa cakendi cakululyo Kwilu. <sup>21</sup> Klistu Wekala pacipuna cabulemu capita bendeleshi bonse bamu makumbi, batangunishi bonse bakute ngofu kayi ne bami bonse. Ukute lina lyalemekwa kupita maina onse alipo pacino cindi nambi eti akabeko cindi cilesanga kuntangu. <sup>22</sup> Lesa walakoma bintu byonse neku-bibika panshi pa bwendeleshi bwa Klistu kayi walamubika pelu pa bintu byonse kwambeti abe mutwi wa mubungano. <sup>23</sup> Mubungano emubili wa Klistu, kayi ewesulilwa ne Klistu, uyo ukute kwisusha bintu byonse cakupwililila.

## 2

### *Kufuma ku lufu kuya kubuyumi*

<sup>1</sup> Mumasuba akunyuma mwalikuba mwafwa ku mushimu cebo cakutanyumfwila Lesa kayi ne bwipishi bwenu. <sup>2</sup> Pakwinga pa cindico mwalikukonkela nshila shaipa sha cishici, mwalikun-yufwila mwendeleshi mukulene wa mishimu yaipa wa mumpepo, mushimu waipa uwo eukute kwendeleshenga bantu batanyumfwili Lesa.

<sup>3</sup> Cakubinga twense twalikubeti endibo kayi twalikwinsa bintu kwelana ne bwikalo bwaipa bwakusemwa nabo. Kwinsa bintu bilayandanga mibili ne manjeyaulwa etu. Mu bwikalo bwetu bwakusemwa nabo bulico twalikuba twelela kutambula cisubulo ca Lesa celela bantu bonse.

<sup>4</sup> Nomba luse lwa Lesa nkalupu kayi lusuno lwa Lesa ni lunene. <sup>5</sup> Nambi twalikuba twafwa ku mushimu cebo ca bwipishi bwetu, Lesa walatuletela buyumi pamo ne Klistu. Ni kwina moyowa kwa Lesa ekwalamupulusha. <sup>6</sup> Pakwikatana pamo ne Klistu Yesu, Lesa walatutantika pamo ne Klistu kucishi ca kwilu kwambeti tukabeteke pamo nendiye. <sup>7</sup> Lesa walenseci kwambeti bantu benshibe kukonempa kwa kwina moyo kwakendi kutambiki kupitila mulusuno lwa Lesa ndwalatulesha muli Klistu Yesu. <sup>8</sup> Pakwinga Lesa niwankumbo walamupulusha, cebo cakumushoma. Nte mungofu shenu mobene nsombi ni cipo ca Lesa. <sup>9</sup> Muntu nkakute kupuluka pacebo ca ncito shakendi, kutineti ngaulitunta.

<sup>10</sup> Lino Lesa ewalatubamba mbuli ncetubele, neco pakwikatana ne Klistu Yesu walatubambila

buyumi bwa ncito shaina isho nshalatubambilalimo kushinsa.

*Twense tobamo muli Klistu*

<sup>11</sup> Kamwanukani ncemwalikuba. “Amwe mwalasemweti bantu ba mishobo naimbi, nkamwalikuba bapalulwa” Mbuli ncebaliikumukuwa Bayuda abo balikulibandeti “bapalulwa.” Kupalulwa uko bantu nkobalikwinsa pa mibili yabo. <sup>12</sup> Pa cindi cisa mwalikuba patali ne Klistu, mwalikuba bantu bakunsa, nkamwalikuba bantu basalwa ne Lesa. Nkamwali kukute lubasu mumapangano Lesa ngalapangana ne bantu bakendi ayo alikuba ebakwa pa malayano. Mwalikwikala pa cishi capanshi kwakubula ciliconse ca kupembelela, nkamwali kumwishiba Lesa sobwe. <sup>13</sup> Nomba pacino cindi mpomwekatana ne Klistu, amwe mwalikuba patali ne Lesa, mwalesa pepi nendiye cebo ca lufu lwa Klistu. <sup>14</sup> Pakwinga Klistu mwine ewalatupa lumuno pakubaleta pamo Bayuda ne bantu bamo. Mpwalalibenga walamwaya lubumbu lwali kutupansanya ne kutupelanya. <sup>15</sup> Yesu walaishikisha kumapwililisho milawo yonse ya Ciyuda ne malailile ne miyambo yonse ya Bayuda kwambeti pa mishobo ibili isa apangepo mushobo umo wekatana nendiye wela kuleta lumuno. <sup>16</sup> Lufu lwakendi lwalapwisha kupelana kwalikuba pakati pa mishobo ibili isa kwambeti apange kuba mubili umo, pakwinseco walabaleta bonse pepi kuli Lesa. <sup>17</sup> Neco, Klistu walesa kukambauka Mulumbe Waina wa lumuno kuli njamwe bamishobo naimbi

omwalikuba patali ne Lesa, kayi ne ku Bayuda abo balikuba kendi pepi nendiye. <sup>18</sup> Pakwinga lino kupitila muli Klistu twense, Bayuda ne bantu bamishobo naimbi ngatucikonsha kushika pa menso a Lesa Bata mu Mushimu Uswepa umowo.

<sup>19</sup> Neco, amwe bantu bamishobo naimbi ntamwe bantu bakunsa, nambi bensu sobwe. Amwe lino mulaba baneshi pamo ne bantu ba Lesa, mulaba banabendi Lesa. <sup>20</sup> Nenjamwe mulebakwa palulindi lwalebakwa nebatumwa ne bashinshimi, nomba nendi Klistu elibwe lya nkokola ya ng'anda. <sup>21</sup> Ewatabilisha ng'anda yonse ne kwikonempesha kwambeti ibe Ng'anda ya Swepa ya Mwami. <sup>22</sup> Pakwikatana pamo ne Klistu nenjamwe mulebakwanga pamo ne banenu bashoma Lesa kwambeti mube musena mwela kwikala Lesa kupitila mu Mushimu.

### 3

#### *Ncito Paulo nsalenshila bantu bamishobo*

<sup>1</sup> Pacebo ici, ame Paulo encondasungilwa mujele,cebo cakusebensela Klistu Yesu. Ndamupaililinga kuli Lesa amwe bantu bamishobo. <sup>2</sup> Ndashometi mwalanyumfweti Lesa mukwina moyo kwakendi walampa ncito yakukambauka mulumbe wakendi kulinjamwe. <sup>3</sup> Ndamulembele mwakufumfwipisha mbuli Lesa ncalayubulula kuli njame mano akendi asolekwa. <sup>4</sup> Mwabelenga ncondalembe ni mwinshibe lwishibo lwakame lwasolekwa alambanga sha Klistu. <sup>5</sup> Mu masuba akunyuma bantu nkabali kwambilwapo awa mano

asolekwa, nomba cino cindi Lesa layubululunga kuli batumwa ne bashinshimi bakendi kupitila mu Mushimu Uswepa. <sup>6</sup> Ico casolekwa nicakwambeti kupitila mu Mulumbe Waina, bantu bamishob naimbi pamo ne Bayuda nabo belela kutambulako colwe ca Lesa, pakwinga naboyo ni bilama bya mubili umo, kayi belela kumantamo lubasu mu malayano ngwalabamba Lesa kupitila muli Klistu Yesu.

<sup>7</sup> Ndalaba musebenshi wa Mulumbe Waina kupitila mu cipo cabulyo cakendi capalubasu ico Lesa ncalampa kupitila mu kusebensa kwangofu shakendi. <sup>8</sup> Ame ndemung'ana kupita bantu ba Lesa bonse, nsombi Lesa walampa colwe ca kukambauka Mulumbe Waina ku bantu bamishobo naimbi ulambanga sha buboni butapu bwa Klistu, <sup>9</sup> kayi ne kwambeti bantu bonse beshibe bubambo bwakendi nceti busebense, ubo Lesa walabumba bintu byonse mbwalikuba wasoleka kwa byaka bitabelengeke. <sup>10</sup> Pa cino cindi layandangeti, kupitila mu mubungano, ne bangelo abo balendeleshenga kayi bakute ngofu Kwilu, beshibe mano a Lesa apusanapusana. <sup>11</sup> Lesa walenseco kwelana ne bubambo bwakendi bwacindi conse mbwalakwanilisha kupitila muli Klistu Yesu Mwami wetu. <sup>12</sup> Mukwikatana pamo ne Klistu, kayi kupitila mulushomo lwetu mulyendiye, twasunguluka kumushikila Lesa kwakubula kutonshanya. <sup>13</sup> Neco ndamusengengeti kamutatyompwa cebo ca mapensho ngondamupengelenga, kupenga kwakame ni kwambeti mucanemo bwinishi.

*Lusuno lwa Klistu*

14 Pacebo ici ndasuntamanga kuli Lesa Bata,  
 15 uko mukowa wonse wa kwilu ne pa cishi  
 ca panshi nkokute kucana lina lyancinencine.  
 16 Ndapailinga kuli Lesa kwambeti kufuma  
 mu buboni bwakendi bwacindama amupe  
 ngofu kupitila mu Mushimu wakendi kwambeti  
 muyume mu myoyo yenu. 17 Kayi ndapailingeti  
 kupitila mu lushomo ndomukute, kwambeti  
 Klistu ekale mu myoyo yenu. Kayi ndapailleti  
 mube ne miyanda yashimpa mulusuno kayi  
 mwibake buyumi bwenu bonse mulusuno,  
 18 kwambeti amwe pamo ne bantu bonse  
 ba Lesa, mucikonse kwishiba kukonempa  
 ne kutalimpa ne mushimba ne kuya panshi  
 kwalusuno lwa Klistu. 19 Ee, ndapailingeti  
 mulwinshibe lusuno lwakendi Klistu lwapita  
 mano onse abantu, kayi kwambeti Lesa esushe  
 cakupwililila buyumi bwakendi mulinjamwe.

20 Lino bulemeneno bupewe kuli Lesa uyo,  
 kupitila mu ngofu shakendi shilasebensenga  
 muli njafwe, wela kutupa conse nsetwela  
 kusenga nambi kuyeyapo. 21 Mubungano upe  
 bulemeneno Lesa kupitila muli Klistu Yesu mu  
 misemano yonse kucindi ca cindi. Ameni.

## 4

### *Kwikatana pamo mu mubili wa Yesu*

1 Ecebo cakendi ame, ndasungwa mujele cebo  
 ca kusebensela Mwami Yesu, ndamusengengeti  
 mwende mubuyumi kwelana ne Lesa  
 ncalamwambila pacindi ncalamukuwa.

2 Cindi conse kamubani balicepesha babomba

moyo, bekalika cali. Leshani lusuno lwenu pakulekelelana umo ne munendi. <sup>3</sup> Kamwinsani ciliconse ncemwela kukonsha kwambeti musunge lwikatano ndomulapewanga kufuma mu Mushimu Uswepa uwo ulamwikatanyanga mu lumuno <sup>4</sup> Pali mubili umo kayi pali Mushimu Uswepa umowa, nako kupembelela ni kumo uko Lesa nkwalamukwila. <sup>5</sup> Kuli Mwami umowa, lushomo lumo kayi ne lubatisho lumowa. <sup>6</sup> Kayi kuli Lesa umowa Ishetu twense, Mwami wa bonse, uyo ukute kusebensa kupitila muli bonse kayi uli mu bantu bonse.

<sup>7</sup> Umo ne umo wanjafwe walatambula cipo camwelela capalubasu kwelana ne mwelo Klistu ngwakute kupa. <sup>8</sup> Mbuli Mabala ncalambangeti, “Lino mpwalatanta Kwilu kukakumeko walamantilila bakaili bangi ne kupa bipo ku bantu.”

<sup>9</sup> Inga awa maswi akwambeti, “Walatanta” Alapandululunga cani? Maswi awa alapan-dululungeti walaseluka nanshi pacishi capan-shi. <sup>10</sup> Neco uyo walaseluka pacishi capan-shi endiye walatanta Kwilu Kumayoba, kwambeti acanikenga kulikonse pa cindi conse. <sup>11</sup> Endiye walapa bipo kubantu pakubasaleti nabambi babe batumwa, nabambi kuba bashin-shimi nabambi kuba beshikukambauka Mulumbe Waina nabambi kuba bembeshi kayi ne beshikwiyisha. <sup>12</sup> Walenseco, kwambeti bantu ba Lesa babe balibambileti basebense ncito yakuyuminisha mubili wa Klistu. <sup>13</sup> Mpaka twense tukaboweti muntu umo mukushoma kwetu, kayi ne kumwishiba cena Mwanendi Lesa, nitukabe bantu bakula mubuyumi bwaku-

mushimu nekushika pabwikalo bwapwililila bwa Klistu. <sup>14</sup> Nteti tukabeti batwanike bela kunyakwa ne mankape kayi ne kumantika kuya uku ne uku ne lukupwe lutekalikana lwakwiyisha kwa bantu bandemishibili, abo bakute kutwala banabo mubwipishi kupitila mu mung'ambilo yabucenjeshi. <sup>15</sup> Nsombi afwe twela kwamba cancinencine kupitila mulusuno, kwambeti tukule munshila iliyonse muli Klistu, nendi emutwi wa mubungano. <sup>16</sup> Nendi elendeleshenga bilama byonse bya mubili ne kubikatanya pamo. Cilama ciliconse ca mubili canungwa ne mishisa. Lino na cilama ciliconse cisebensa ncito yaco, mubili wonse ukute kukula ne kulibaka mulusuno.

*Buyumi bwalino lino muli Klistu*

<sup>17</sup> Lino mu Lina Iya Mwami, ndamwambilinga ne moyo wonse, kwambeti kamutekalangeti bantu batamwinshi Lesa, pakwinga miyeyo yabo niyabulyo. <sup>18</sup> Manjeyaulwa abo ali mu mushinshu. Baliyapo lubasu luli lonse mubuyumi ubo Lesa mbwalapanga, cebo ca bumbutuma bwabo ne kuyuma myoyo. <sup>19</sup> Baliya ne nsoni ayi, cabo nikwinso'wa bintu byaipa nkabalitibuku pakwinsa bintu byaipa bya mushobo uliwonse.

<sup>20</sup> Muliya kwiyapo eti Klistu encalikubeco sobwe. <sup>21</sup> Nicakubinga amwe mwalanyumfwa sha makani alambanga sha Klistu, pakuba bantu bamushoma, mwalayiya cancinencine cili muli Yesu. <sup>22</sup> Neco kamutendanga mu bwikalo bwenu bukulukulu, ubo bwalikumononga ne lunkumbwa lwaipa lwali kumutayisha

mukondo. <sup>23</sup> Myoyo ne manjeyaulwa enu asanduke kuba a linolino. <sup>24</sup> Kamufwalani buyumi bwa linolino, ubo Lesa mbwalalenga mu cikoshanyo cakendi kwambeti bantu bonse baboneti mwekala mubuyumi bwalumbuluka.

<sup>25</sup> Neco, lekani bwepeshi, umo ne umo ambenga cancinencine ku munendi, pakwinga twense tobilama bya mubili wa Klistu. <sup>26</sup> Nambi mukalala, kamutaleka bukalu bwenu bumutwale kubwipishi, lisuba kalitebila kamuli mwakalala. <sup>27</sup> Kamutamupa Satana mwanya wa kumusunka. <sup>28</sup> Abo balikukute cinga ca kwiba baleke kwiba, batatike kusebensa cangofu ne makasa abo kwambeti balinyamfwenga bene kayi ne kunyamfwako bapenshi. <sup>29</sup> Maswi aliwonse amucobwe katapulanga pamulomo penu, nsombi maswi enu abe akuyuminisha mbuli ncecilayandikinga kwambeti balanyumfunga abakondweleshe. <sup>30</sup> Kayi kamutanyumfwishanga nsoni Mushimu Uswepa wa Lesa, pakwinga Mushimu Uswepa ecando cilaleshengeti njamwe banabendi Lesa ico ncabika pali njamwe cakwinshibilako mpaka cindi Lesa nceti akamupulushe. <sup>31</sup> Neco kamulekani mfundilishi, kupelana, ne kukalala. Kamutaba beshi kukalauka, nambi kutukana nambi kuba ne miyeyo yaipa ya mushobo uliwonse. <sup>32</sup> Nomba kamubani baina moyo, kamubani baliyaba kunyamfwa bantu, beshi kulekelelana umo ne munendi mbuli Lesa ncalamulekelela kupitila muli Klistu.

## 5

*Kwikala mu mumuni*

<sup>1</sup> Neco pakuba banabendi Lesa mbwasuni, kamwelekeshanga kubeti endiye. <sup>2</sup> Buyumi bwenu bwendeleshewe ne lusuno mbuli nendi Klistu ncalamusuna mpaka kushika pakuyaba buyumi bwakendi, cebo canjamwe, walaliyabeti mulumbo kayeti cipo canunkila cena ceshi kukondwelesha Lesa.

<sup>3</sup> Lino amwe pakuba bantu ba Lesa, nkacaina kwambeti makani abufule nambi byasafwana nambi bungola ne munyono kamutabyambanga pakati penu. <sup>4</sup> Nambi kwamba makani ashilila abuluya nambi malendo amatuka. Cenu ni kulumbaisha Lesa. <sup>5</sup> Kamwinshibani cancinecine kwambeti, mufule ne wasafwana mubwikalo nambi mungola. Pakwinga bungola bukute kuba kambwanga kakukambilila, nteti akabemo ne lubasu mu Bwami bwa Klistu ne Lesa.

<sup>6</sup> Muntu katamubepa ne maswi abuluya, pakwinga pacebo ca bintu ibi bukalu bwa Lesa bulakesanga pabantu batamunyumfwili.

<sup>7</sup> Pacebo cilico, kamutekatananga ne bantu balico.

<sup>8</sup> Pakwinga pa cindi nacimbi nenjamwe mwalikuba mumushinshe, lino pakuba bakendi Mwami, mulekalanga mu mumuni.

<sup>9</sup> Pakwinga bisepo bya mumuni ni cintu ciliconse caina, ciliconse calulama kayi cancine ncine.

<sup>10</sup> Kamwelekeshanga kwinsa bintu byeshikukondwelesha Mwami.

<sup>11</sup> Kamutamantangamonga lubasu mu ncito shaipa sha mumushinshe shilenshinga bantu, amwe shibonesheni patuba! <sup>12</sup> Pakwinga

bintu byaipa mbyobakute kwinsa bitaboneke ku menso a bantu nabambi bikute kupa nsoni ne kubyamba. <sup>13</sup> Nomba mumuni ukute kuyubulula bintu byonse ne kubibika patuba kwambeti bantu babibone ncebibele. <sup>14</sup> Pakwinga mumuni ukute kupesheti bintu byonse hiboneke. Ncebakute kwambileti, “Obe wona tulo, punduka kubafu, Klistu nakaleta mumuni pali njobe.”

<sup>15</sup> Neco kamushani mano ku bwikalo bwenu, kamutekalangeti bantu batacinshi ciliconse, nsombi kamubani bantu ba mano. <sup>16</sup> Sebenseshani mwa mano colwe ncemukute pakwinsa byaina, pakwinga awa ni masuba aminyungwe yaipa. <sup>17</sup> Neco kamutapunama, elekeshani kwinsa bintu byalayandanga Mwami Lesa.

<sup>18</sup> Kamutabanga ba cipwaya nongo, pakwinga kunwa kulico ngakononga buyumi bwenu, amwe kamubani besula ne Mushimu Uswepa. <sup>19</sup> Mwekala pamo kamwimbilanga nyimbo sha kutembaula, nyimbo shakulumba Lesa, nyimbo sha mushimu. Nyimbo sha kutembaula Mwami Lesa ne moyo wenu wonse. <sup>20</sup> Cebo ca Lina lya Mwami wetu Yesu Klistu, katulumbani Lesa Bata pa bintu byonse bilenshikinga.

*Balumbe ncebelela kwikala ne bamakashabo*

<sup>21</sup> Kamunyumfwananga umo ne munendi, mwenseco mulalemekenga Klistu. <sup>22</sup> Amwe batukashi mwebwa, kamunyumfwilanga bamaibenu mbuli ncemwelela kunyumfwila Mwami Yesu. <sup>23</sup> Pakwinga mulume emutwi wa mukashendi mbuli Klistu neye ncali mutwi wa

mubungano. Klistu endiye walapulusha bantu mubungano pakwinga emubili wakendi. <sup>24</sup> Neco mutukashi webwa anyumfwile baibendi, mbuli mubungano ncokute kunyumfwila Klistu.

<sup>25</sup> Mutuloba uliyense weba asune mukashendi, mbuli Klistu ncausuni mubungano cakwinseti walensa kubengelapo buyumi bwakendi cebo ca mubungano. <sup>26</sup> Walenseco pakupatulila mubungano kuli Lesa ne kuswepesha pakusambisha mu menshi kupitila mu maswi a Lesa. <sup>27</sup> Kayi walenseco kwambeti autambule mubunganowo kauli wapa kayi waswepa wabula kampenda nambi minkonya nsombi walulama cakupwililila.

<sup>28</sup> Copeleco, mutuloba weba asune mukashendi mbuli ncausuni mubili wakendi. Mulume usuni mukashendi ulisuni mwine. <sup>29</sup> Paliya muntu naba umo walapelapo mubili wakendi, nsombi ukute kulyesha ne kubamba cena, mbuli Klistu ncakute kubamba cena mubungano, <sup>30</sup> twense tobilama bya mubili wakendi. <sup>31</sup> Mbuli Mabala ncalambangeti, "Pacebo ici mutuloba nakashiye baishi ne banyina nekuya kupamankana pamo ne mukashendi, aba babili nibakabeti muntu umo." <sup>32</sup> Mu Mabala awa muli likani linene lyancine ncine lyalikuba lyasolekwa ndyondenshibeti lilambanga sha Klistu ne mubungano. <sup>33</sup> Nambi kulico, alambanga pali njamwe, mutuloba uliyense asune mukashendi mbuli ncalisuni mwine, neye mukashi acindike ibendi.

## 6

### *Bana ne bamashali babo*

<sup>1</sup> Mobana amwe, cebo cakwambeti mobakendi Mwami, neco kamunyumfwilani bamashali benu, pakwinga calulama kwinseco. <sup>2</sup> Mabala alambangeti, “Cindika baiso ne banyoko” Uwu emulawo utanshi muli lulayo lwa kwambeti, <sup>3</sup> “Bintu nibimwendelenga caina, kayi nimukekale ne buyumi butali pa cishi capanshi.”

<sup>4</sup> Ne njamwe bamashali, kamutambilanga bana benu maswi eshi kubakalalisha, nsombi kamubakulisha ne kubalela pakubeyisha ncebela kwinsa mubwikalo bwabo bwa ciklistu.

### *Basha ne bami babo*

<sup>5</sup> Amwe mobasha, nyumfwilani bami mbomulasebenselenga, mwela kubatina ne kubacindika ne moyo wonse mbuli ncemwela kusebensela Klistu. <sup>6</sup> Kusebensa kwenu kakutaba kwa kwena kwa kuyandowa kukondwelesha bami benu, nsombi kamusebensani eti basha ba Klistu balenshinga luyando lwa Lesa. <sup>7</sup> Sebensani ncito kamuli mwakondwa moyo kubeti mulasebenselenga Mwami Lesa, nkamulasebenselenga muntu. <sup>8</sup> Ishibani kwambeti Lesa nakape cilambo muntu uliyense nambi muntuyo ni musha nambi nteye musha pancito njalikwinsa.

<sup>9</sup> Nenjamwe mobami, mukute basha mwelela kwinsa cimocimo ku basha benu kamutabayoshanga sobwe, pakwinga amwe ne basha benu mwense mukute Mwami umowa uyo uli Kwilu utasalululu pakubeteka.

### *Byensho bya kumushimu*

<sup>10</sup> Pakupwililisha ndambangeti pitilishani kuba bantu bayuma mukwikatana ne Mwami kupitila mu ngofu shakendi. <sup>11</sup> Kamufwalani byakufwala bya nkondo byonse, kwambeti mucikonshe kwimana cituloba pakutingana ne tumpindamangobe twa Satana. <sup>12</sup> Nteko kwambeti tulalwananga ne bantu, nsombi tulalwananga ne mishimu yaipa ili mu misena ya kwilu ilayungunga bantu kwinsa byaipa, aba ebami ne bendeleshi ne ngofu shili mumushinshe wacino cindi. <sup>13</sup> Lino pacebo ici, kamufwalani byakulicingilisha byonse mbyalamupanga Lesa kwambeti kamutakakomwa pabusuba bwaipa mbweshi bukenshike, mwakenseco nimukakonshe kwimana cituloba.

<sup>14</sup> Lino imanani cituloba, kamuli mwafwala bintu ibi. Lisungeni mubukome ne lamba wacancinencine, bululami bubeti cishikungilisha cali cenu, <sup>15</sup> kayi kukambauka Mulumbe Waina wa lumuno kubeti nkwabilo nshemwafwala. <sup>16</sup> Kusankanya pali ibi, kushoma Lesa kwenu cindi conse nikukabeti cishango cinene ncemwamanta nceti mukakonshe kulitabilisha ku mifwi ilabangilinga mulilo ilafumunga kuli Satana. <sup>17</sup> Tambulani lupulusho ndwalamupanga Lesa, pakwinga nilukamucingilisheti cisoti cacela, kayi tambulani Maswi a Lesa awo Mushimu Uswepa ngokute kusebensesheti cibeshi. <sup>18</sup> Insani byonsebi mumipailo, kusenga lunyamfwo kuli Lesa. Pailani pacindi cili conse pakutangununwa ne Mushimu Uswepa, kamubani bacetuka cindi

conse kwakubula kutyompwa. Paililani bantu ba Lesa bonse. <sup>19</sup> Kamumpaililangonga kuli Lesa kwambeti ang'ambile ncendela kukambauka kwambeti njishibishe bantu kwakubula buyowa ibyo byalikuba byasolekwa mu Mulumbe Waina. <sup>20</sup> Ame ndamwimanina Yesu Klistu nambi cino cindi ndasungwa mujele cebo cakwambeti bantu beshibe Mulumbe Waina. Kamumpaililako kwambeti ncane ngofu sha kukambauka Mulumbe Waina kwakubula buyowa mbuli ncendela kwinsa.

*Paulo lalayanga*

<sup>21</sup> Lino kwambeti mwinshibe cena sha buyumi bwakame kayi ne ncetulekalanga kuno, ndatumunga Tukiko kuli njamwe mwanse wetu kayi musebenshi wa shomeka mu ncito ya Mwami, nakese akanwambile byonse. <sup>22</sup> Encendamutumini kuli njamwe kwambeti mwinshibe ncetulekalanga ne ncetulenshinga kuno, kayi kwambeti amutontosheko myoyo. <sup>23</sup> Lumuno ne lusuno, kayi ne lushomo lulafumunga kuli Lesa Bata ne kuli Mwami Yesu Klistu bibe pali njamwe mobanse. <sup>24</sup> Kayi kwina moyo kwa Lesa kube pali bantu bonse bakute lusuno lwa ncinencine lutapu pali Mwami wetu Yesu Klistu.

**Soli New Testament**  
**The New Testament in the Soli language of Zambia**  
copyright © 2018 The Word for the World International

Language: Chisoli (Soli)

Contributor: The Word for the World International

**Soli New Testament**

The Word For The World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-14

---

PDF generated using Haiola and XeLaTeX on 22 Feb 2024 from source files dated 15 Apr 2023

f5caf606-2b16-5ef3-9a66-b424be402cb5